

20. oktober 2021

UKA2021/93

Itilliarsoop ikerasaliorfigneqarnissaa piviusunngorteqqullugu Naalakkersuisut suliamik aallartitseqqullugit peqquneqarnissaannik Inatsisartut aalajangiiffigisassaattut siunnersuut. Ikerasaliaq Nordstar 30-imit assigisaanilluunniit aqqutigineqarsinnaasunngorlugu isissusilerneqarlunilu silissusilerneqassaaq.

Qujanaq siunnersuuteqartumut, siunnersuut Siumumiit imatut oqaaseqarfigissavarput.

Siunnersuuteqartup eqqaanninneratut siunnersuut siullermeerluni siunnersuutigineqanngilaq, taamaattumik aamma paasissutissat pigineqareersut aallaavigineqarnissaat pissusissamisoorpoq.

Siunnersuummi tunngavilersuutit aallaavigalugit paasinarluinnarpoq ikerasaliornarup pinngortitamut, orsussamik atuinerup sillimaniarnermullu iluaqutaasinnaassusia.

Aamma maluginiarparput siunnersuummi qaqugu sanaartortoqalernissaa eqqartorneqanngimmat Inatsisartulli aaliangiiffigisassamik saqqummiiffigineqartut suliap naalakkersuisunut aallarternarinnissaa aallaavigalugu isummeqquneqarluta.

Tamanna paasilluarparput, aamma Nunatta kujasinnerusortaani pisut, pisinnaasullu eqqarsaatigalugit.

Nunap immikkoortuata kujataani Qaqortumi, Narsami, Nanortalimmi eqqaanilu inoqarfinni ullumikkut inissisimaneq annertuumik unammillernartumik unittoornermik nalaataqarpoq. Siumumi isumaqarpugut massakkuusoq iliuseqarnissaaq siunissami takorluukkamik ataqatigiissumik pisiaqartitsiffimmi.

Siumumi neriuutigivarput Mittarfik 1500 meteri sananeqassasoq, taassuma malitsigisaanik takornariaqartitsinerup ineriartortinnerusinnaanera periarfissinneqarniassammat, taamaattorli takornariaqarnerup ataqatigiinnerusumik assigiinnerusumillu ineriartorsinnaanera ikerasaliap periarfissinnaagaa qaqortoq kisiat aallaavigineqassanngippat. Nunatta Kujataani nunap immikkoortua Nanortalup eqqaamiunullu attavilerneqaruni isumannaannerusumik tikikkuminarnerulissaaq, tutsuiginarnerusumik pilersaarusiortoqalersinnaanera periarfissikkusukkatsigu.

Siunnersuutip iluaqutissarujussuata aappaa pinngortitamik illersuinissamik aallaaveqartoq maluginiarparput, aqqutigisinnaasap naninerisugit orsussamik atuinerup annikillinerisigut, angallanneq akikilliinnarani aamma motorilinnik angallatinik mingutsitsinerat pinngitsoorsinnaanngisarput annikillisingaatsiarnissaa qularutigingilarput.

Takorloorsinnaavarput mittarfiliorneq aallartippat ikerasaliornermi sakkut atorsinnaasat Qaqortumik pigineqalereersimassasut, taamaalluni ikerasaliornermi aningaasartuutaasinnaasut



takorloorsinnaavagut annikillisinneqarsinnaasut Nunatta kujataani
sanaartornerit ukiuni nutaanerusuni ingerlanneqarneranut
taputartuunneqarsinnaappat.

Siumumiit oqartariaqarpugut naalakkersuisut siunnersuummut akissutigisaat paasiuminaatsillutigu.
Siunnersuummi nutaarsiassaangitsoq siullermi marloriarluni Inuit Ataqtigiinnit
siunnersuutigineqartarsimammat akerlerineqanngitsumik pissutsilli assigiinngitsut peqqutigalugit
ipisuusisumik inerneqartarlutik.

Taamatut oqareerluta Siumumi paasinngeriaannarparput tunngavilersuut paasilluarneraatigalugu
tunngavilersuutit allarlunnarput pioreersunut umiarsualiveqarnermut aserfallatsaaliinissaq
toqqammavilersuutigalugu itigartitsiniarnerat. Imaanngilaq Siumumi paasinngikkippat
aserfallatsaalinerit pisariaqartut aningaasanillu pioreersunut atorniarneqartut.

Paasisarpulli unaavoq, akissaqanngilagut innuttaasunut akikinnerulersitsisussamut, innuttaasunut
isumannaallisaasussamik, pinngortitamik mingutsitsinermik annikilliliisussamik naggataatigut
aamma paasivarput akissaqanngitsugut Nunatta immikkoortuani kujataani takornariaqarnerup
tamakkiinerusumik ineriartortinnissaanut pisariillisaataasinnaasumut.

Hans Peter Poulsen, Siumut